



Senin, 02 April 2024

Ogen: Kuan-kuanen 19:27



Terus Erlajar



Erlajar e me sada dahin si la pernah dung, sabap reh buena si pelajari, reh buena si la si eteh. Metode erlajar si la pernah ketadingen jaman e me ngoge. Arah ngoge melala si dat pemete, pengangkanta reh mbagesna, kosa katanta reh buena, cara rukurta pe reh terbukana, penginegetta reh payona, caranta ngerana reh sikapna, la ka murah setres.

Kitab kuan-kuanen melala nehken kata ajar man banta. Wari enda pe iajarina kita gelah tetap erlajar. "O anakku adi lanai kam nggit erlajar, lupa me kam nandangi kai si ipelajarindu." Guru hikmat mereken pedah maka labo mbuesa adi erlajar. Arah kai pe kita banci erlajar, arah lingkungan sekelewetta, arah megiken pedah orang tua entah guru ras sidebanna. Ulu pemetehta salah sadana e me buku.

Interenational Board of Books for young People (IBBY) netapken tanggal 2 April 1966 e me wari buku anak internasional. Ikawitken ku bas wari ketubuhen Hans Christian Andersen, sekalak penulis i Denmark nari. Tulisenna e me cerita cerita dongeng man anak-anak. Contohna : The Ugly Duckling, The Little Mermaid ras sidebanna. Tulisenna enda ngajuk anak-anak gelah meriah akapna ngoge. Enda me si jadi perayaken wari buku anak international.

Genduari budaya ngoge enggo reh urakna. Anak-anak mekijat ngoge, orang tua pe mekijat ngoge. Buku genduari lanai melala, amin pe lit buku online labo tertarik kalak ngogesa. Banci saja i bas era tehnologi enda, melala cara si banci mereken informasi man banta amin pe lanai ngoge. Tapi arah renungenta enda isingetken maka perlu denga kita ras anak-anakta ngoge, gelah otakta terlatih, la murah lupa, la murah setres, cara rukur ras muat keputusen reh ulina.